

EURORA HELTZeko MAASTRICHTEKO ITUNEKO IRIZPIDEK BAINO EZ DUTELA BALIO ESAN DU

Kohl: «Ez dago hegoaldeko herriak eurotik baztertze inolako planik»


■ Espainia, Italia eta Portugal baztertzea gomendatzen zuen Bundesbankek eta Alemaniako Gobernuak landutako txostena ez da existitzen, Helmut Kohl kantzelerariak atzo ziurtatu zuenez. Maastrichteko Ituna da eurora pasatzeko galbahe bakarra, Kohlek esan zuenez.

Efe / Bonn

HELMUT KOHL Alemaniako kantzeleraria eta Romano Prodi Italiako lehen ministroa Bonnen bildu ziren atzo, herri bien arteko goi bilera zela eta. Bilera ostean prentsa agerraldia egin zuten agintariek, eta Kohlek ukatu egin zuen Europako hegoaldeko herriak eurotik baztertze planik dagoela. «Eurora lehen fasean heltzeko kontuan hartuko den irizpidea Maastrichteko Ituna da», berretsi zuen Alemaniako kantzelerariak. «Etxeko lanak gauraz egin behar dituzte herriak, irizpideak eta egutegia bete ahal izateko. Horixe da gure jarrera». Hala adierazi zuen Kohlek, eta ukatu egin zuen aurreko egunotan Europako hainbat hedabidetan zabalduko informazioa.

Asteazkenean *Financial Times* egunkari boteretsuak Alemaniako gobernuak eta Bundesbank banku zentralak landutako balizko plan baten berri eman zuen. Egitasmo horren xedea Espainia, Italia eta Portugal eurora lehen fasean heltzea eragozteko litzateke. Europako hegoaldeko herriak baztertze, Alemaniak Maastrichteko Itunean hitzartutako egutegia aldatuko luke Alemaniak. Datak ere eman zituen Britainia Handiko *Financial Times*-ek, eta Italia euroa 2000. edo 2001. urtean sartuko zela ziurtatu zuen. Horrez gainera, alaketok nolabait zuzentzeko, Bruselak Italiari akordio berezi bat proposatuko lioke.

Portugal eta Italiako ardura-dunek berehala erreakzionatu dute, eta Maastrichteko Ituna errespetatzeko bermeak eskatu dituzte. Espainiak, ordea, eurora lehen fasean helduko dela ziurtat eman du. Alemaniako Gobernuak Ogasun ministroak,



Helmut Kohl Alemaniako kantzeleraria eta Romano Prodi Italiako lehen ministroa, atzo Bonnen. HERMA KNIPPERTZ AP

Theo Waigelek, Londresen argitaratara emandakoa ezagutu eta berehala dena ukatu egin zuen. Kohl kantzelerariak Italiako *La Repubblica* egunkarian zabalduko iritzi artikulua batean Maas-

trichteko Itunaren balioa berretsi zuen.

Atzo Bonnen izandako Italia eta Alemania arteko goi bileran, Romako Gobernuak ardura-dunek lehen fasean eurora heltzeko

egin dituzten esfortzuak gogorazti zizkion Kohli. Horrez gainera, «lehen fasean sartzeko itxaropena izateko eskubide osoa» dutela gogorarazi zion Prodi Kohli. X

SEPIk 10.000 milioi sartu ditu Babcock Wilcoxen enpresako 550 langile kaleratzea finantzatzeko

■ Beste 4.000 milioi pezeta inbertituko ditu finantzak saneatu eta pribatizazioari ekiteko

J. Aiarza / Bilbo

BABCOCK WILCOX enpresaren kapitala 10.000 milioi pezeta gehitzea onartu zuen atzo Estatuko Enpresa Partaidetzarako Sozietateak (SEPI), enpresaren jabeak. Erabaki horrekin, Bizkaiko enpresa pribatizatzeko prozesua zabaldu du SEPIk. Prozesu horretan, enpresaren finantza egoera saneatu eta 550 langile kaleratzea ordaintzea da urrats nagusia.

BWren nagusiek eta langileek

Plan Estrategikoa onartu zuten iragan abenduan. Plan honen helburuak bete ahal SEPIk beste 4.000 milioi pezetako kapital ekarpena egingo du Galindoko konpainian.

Diru horrekin guztiarekin, gehi enpresak erabiltzen ez dituen aktiboen salmentaren bidez lortuko duenarekin, behar dituen 15.000 milioi inguru lortuko ditu BWk langile kaleratzea ordaindu eta finantza egoera osasuntzeko.

Babcock Wilcox Estatuko ekipamendu ondasun sektoreko

enpresa nagusietako bat da, eta munduko zentral termiko ekoizle nagusietakoa. Enpresaren azken kontratua Argentinan zentral termiko bat ekoizteko izan da, 30.000 milioi pezetako. BWtik azpimarratu dutenez, kontratu horri eskerrak Bizkaiko konpainiak Espainiako beste 250 enpresa kontratatatu eta milioika lanordu sortaraziko ditu.

Konpainiak barne berregituraketa egin du, Ramon Vecinok zuzendaritza eskuratu duenetik. Erosketa eta kontratazio atalak,

enpresa filialak eta nazioarteko komertzializazio sarea izan dira egokitutako sailak. Horri esker, «BWk eskari zorroa berreskuratu eta kontratazio aukera berriak sortu ditu epe laburreko», azpimarratu dute enpresatik.

Enpresaren Plan Estrategikoa UGT, CCOO eta ELA sindikatuek onartu zuten, ez ordea LABek. Abenduaren 17an eginiko erreferendumean, berriz, langile gehienek onartu jo zuten Egitasmoa eta langile kaleratzea. X

Gasolina inoiz baino garestiagoa gaurdanik

■ Superra 0,2 pezeta igo da eta berunik gabekoa 0,4

Efe / Madril

GASOLINA inoiz izan duen preziorik altuenera iritsiko da gaur, Madrilgo Gobernuak erabakitako azken prezio igoera indarrean jartzen duen. Super gasolinarentzat 20 zentimoko igoera eta berunik gabekoarentzat 40 zentimokoa onartu du Industria Ministerioak. Ondorioz, super gasolina litroko 121,2 pezeta kostako da gehienez, eta berunik gabekoa 117,4 pezeta gaurtik hilaren 14ra arte. Super gasolinak, Espainian gehien kontsumitzen denak, hamaika aldiz hautsi ditu goreneko prezioak azken urtean, eta bi aldiz jarraian egin du azken bi asteotan.

Igoera hauen arrazoia ez da izan petrolioaren prezioaren igoera, ohi den bezala, dolarren igoera baizik. Izan ere, erregaiak dolarretan ordaintzen dira nazioarteko merkatuetan, eta, ondorioz, EEBB-tako dibisa garestitzeak eragina izaten du azken salneurrian. Azken asteotan dolarra sei pezeta garestitu da pezetaren aldean eta ondorengo asteetan ere bere prezioak gora egingo duela iragarri dute. X

Sidenorrek % 25 gehitu ditu irabaziak 3.580 milioitara arte

■ Pribatizatu zenetik lehenengo ekitaldia ontzat jo du enpresak

J.A. / Bilbo

SIDENOR taldeak 3.580 milioi pezetaren irabaziak lortu zituen iazko ekitaldian (143 milioi libera), aurrekoan baino % 25 gehiago, enpresatik jakinarazi dutenez. Altxairu bereziak ekoizten dituen eskal taldearen salmentak ia 55.000 milioi pezetakoa izan ziren, hau da, % 4 gutxiago aurrekoekin alderatuta. Hala ere, produkzio kostuen egokipenari eta balio erantsi handiko produktuetan espezializatu izanari esker, enpresak hobetu ahal izan ditu emaitzak.

Sidenor pribatizatu zenetik lehenengo ekitaldia izan zen 1996koa. Enpresak 2.000 milioi pezetatik gora inbertitu du ekitaldi horretan. Era berean, esportazioak gehitu egin ditu salmenta guztien % 43 izateraino. Esportazio hauen % 90 Europako Batasuneko lurraldeetara zuzendu ditu Sidenorrek.

Kalibrazio eta estanzazio enpresak dira Sidenorren sektore erosle nagusietako batzuk, salmentaren % 21 eta % 19rekin hurrenez hurren, biltegien ostean, % 23ekin. X